

दिनांक : 20.03.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- कृषि अर किसान कल्याण मंत्री शिवराज सिंह चौहान देश मांय खेती-बाड़ी ऊँ जुड़्या हालात रो जायजो लीनो-राज्य सरकार ई अधिकारियां ने बीमित किसानां रा बारिश-ओळा रे कारण फसल खराबा री सूचना तुरत बीमा कंपनी ने देवण रा हुकम दीना ।
- राजस्थान हाईकोर्ट राज्य सरकार ने प्रदेश री सगळी सरकारी स्कूलां रो सुरक्षा प्रमाणन जुलाई महीना ऊँ पैली पूरो करावण रा हुकम दीना ।
- राष्ट्रपति द्रौपदी मुर्मू रो काल गोवर्धन यात्रा रो कार्यक्रम-डीग ज़िला प्रशासन हिफाजत रा पुख्ता इन्तजाम कीना ।

अर

- ईद-उल-फितर रो त्यौहार काल हरख-उमाव सागे मनायो जावेला ।

000

केई राज्यां मांय बेमौसम बारिश व्हेवण अर ओळा पड़बा रे कारण व्ह्या फसल खराबा ने ध्यान राखता थकां कृषि अर किसान कल्याण मंत्री शिवराज सिंह चौहान आज नई दिल्ली मांय आला अहलकारां सागे मीटिंग कर र देश मांय खेती-बाड़ी ऊँ जुड़्या हालात रो जायजो लीनो । श्री चौहान सोशल मीडिया पोस्ट रे जरिये कह्यो के किसानां ने जल्द ऊँ जल्दी साता देवण सारू तुरत सर्वे अर जरूरी कार्रवाई रा हुकम दिया ज्या है । ई बीचे राज्य रा ई केई हलका मांय बिरखा व्हेवण अर ओळा पड़बा रे कारण कट्योड़ी साखां ने नुकसाण व्हयो है । जालौर ज़िला मांय ईसबगोल री साख ने बत्तो नुकसाण व्हेवण री शंका है । कृषि विभाग अहलकारां ने साखां रो बीमो करायोडा किसानां कानी ऊँ फसल खराबा री जाणकारी तुरत बीमा कंपनी ने देवण रा हुकम दीना है । अहलकार गांवां मांय शिविर लगा र तैय प्रारूप मांय जाणकारी जुटा रह्या है । फसल बीमा रो काम देख रह्या संयुक्त निदेशक डॉ. जगदेव सिंह बतायो के फसल खराबा वाळा किसानां ने इण ऊँ जुड़ी जाणकारी संबंधित बीमा कंपनी ने 72 घंटा री मियाद मांय देवणो जरूरी है ।

.....
प्रदेश रा केई हलकां मांय आज ई तेज बायरो बाजण सागे बिरखा व्ही अर कठे-कठे ओळा पड़्या । जयपुर अर आरे-सारे रा हलकां मांय तड़के व्ही बिरखा ऊँ पारो उतर गयो । टोंक अर धौलपुर मांय ओळा पड़बा ऊँ साखा ने नुकसाण व्हेवण री शंका है । भरतपुर, सवाईमाधोपुर अर सीकर समेत केई ज़िलां मांय रुक-रुक र बिरखा व्ही । लारला 24 घंटां मांय बाड़मेर, अलवर, जैसलमेर अर बीकानेर मांय बिरखा व्हेवण रा समाचार मिल्या है । मौसम मांय बदलाव ऊँ पारो सामान्य ऊँ 5 डिग्री सेल्सियस ताई उतर गयो है । मौसम केंद्र जयपुर रा निदेशक राधेश्याम शर्मा बतायो के आवता एक-दो दिन प्रदेश रा कुछ हलकां मांय तापमान सामान्य ऊँ कम रेहवण रा आसार है ।

000

जलदाय मंत्री सुरेश रावत कह्यो है के पंजाब सरकार री ओर ऊँ पाणी री रॉयल्टी रा चुकारा री कथित बाकियात रा बारा मांय कोई कागद नी मिल्यो है । श्री रावत आज जयपुर मांय खबरनवीसां सागे

बातचीत कर रह्या हा। जलदाय मंत्री कह्यो के राज्यां बीचे पाणी रा बंटवारा ऊँ जुड्या झगड़ा-टन्टा रो निपटारो केंद्र सरकार करे है।

रावत कह्यो के पंजाब सरकार री ओर ऊँ चिट्ठी मिलण री सूरत मांय वां रो ज़रूरी जवाब दियो जावेला।

.....
ध्यानजोग है के पंजाब रा मुख्यमंत्री भगवंत मान लारला दिनां राजस्थान माथे पाणी री रॉयल्टी री मोटी रकम बकाया व्हेवण रो आरोप माण्ड्यो हो।

000

भारतीय जनता पार्टी रा प्रदेश अध्यक्ष मदन राठौड़ कह्यो है के दुनिया रा हालात, खासकर युद्ध ऊँ आखी दुनिया ने नुकसाण व्हे है। आज जयपुर मांय प्रदेश भाजपा मुख्यालय मांय खबरनवीसां सागे बातचीत करता थकां राठौड़ कह्यो के देश मांय जरूरी सामान री कोई कमी नी है। वे विपख माथे जरूरी चीजां री कमी रो माहौल बणा र जनता ने गुमराह करण रो आरोप माण्ड्यो।

000

राजस्थान हाईकोर्ट राज्य सरकार ने जुलाई महीना ऊँ पैली प्रदेश री सगळी सरकारी स्कूलां रो सुरक्षा प्रमाणन करावण रा हुकम दीना है। स्वप्रेरित संज्ञान ले र सुणवाई करता थकां न्यायमूर्ति महेंद्र गोयल अर न्यायमूर्ति अशोक कुमार जैन री खंडपीठ सरकार ने स्कूलां रा विकास सारु जनता री मदद लेवण ने बणावो देवण री राय दीनी। खंडपीठ कह्यो के स्कूलां री लिस्ट सार्वजनिक करण री सूरत मांय लोग खुद मदद सारु आगे आवेला। राज्य सरकार री ओर ऊँ महाधिवक्ता राजेंद्र प्रसाद अदालत ने बतायो के नेशनल एजुकेशन पॉलिसी रा प्रावधानां रा तैत समितियां बणा र स्कूलां री जांच करायी जावेला अर आवता साल 859 नुवा स्कूल भवन बणाया जावेला। ई सागे ई जूना कमरां री मरम्मत अर शौचालय बणावण रा काम ई कराया जावेला।

000

राष्ट्रपति द्रौपदी मुर्मू रो काल गोवर्धन यात्रा रो कार्यक्रम है। इण ने ध्यान राखता थकां जिला कलेक्टर उत्सव कौशल अर एस.पी. कांबले शरण गोपीनाथ पूंछरी का लौठा हलका मांय दौरा री बगत राष्ट्रपति री हिफाजत ऊँ जुड़ी व्यवस्था रो जायजो लीनो। एस.पी. बतायो के राष्ट्रपति री हिफाजत सारु 400 ऊँ बत्ता पुलिस वाळा तैनात करी ज्या है। गोवर्धन जी परिक्रमा रा राजस्थान री सरहद मांय आवण वाळा गेला अर रूट चार्ट माथे लगातार निगराणी करी जा रही है।

00

रेल मंत्री अश्विनी वैष्णव रो काल जयपुर रा दौरा रो कार्यक्रम है। श्री वैष्णव उत्तर-पश्चिम रेलवे रा मुख्यालय मांय न्यारी-न्यारी परियोजनावां रो जायजो लेवेला। रेल मंत्री जयपुर रेलवे टेशन रो ई दौरा कर र विकास रा न्यारा-न्यारा कामां रो जायजो लेवेला।

000

रेल मंत्रालय जोधपुर-हावड़ा अर बीकानेर-हावड़ा एक्सप्रेस गाड़ियां रे बांदीकुई जंक्शन माथे आती-जाती बगत ठहराव ने मंजूरी दे दीनी है। पैली अ गाड़ियां एक बगत ई रुकती ही, जो अब आती-जाती दोन्यू बगत रुकेला। जोधपुर-हावड़ा एक्सप्रेस सप्ताह मांय चार दिन अर बीकानेर-हावड़ा एक्सप्रेस सप्ताह मांय तीन दिन चाले है।

0000

राज्यपाल हरिभाऊ बागड़े कह्यो है के खेती-बाड़ी देश री माली व्यवस्था री रीढ़ है अर देश री मोटी आबादी ई माथे निर्भर है। वे आज जोधपुर कृषि विश्वविद्यालय रा सातवां दीक्षांत समारोह मांय बोल रह्या हा। राज्यपाल खेती-बाड़ी अर प्रौद्योगिकी रा हलका मांय नवाचार आधारित शोध ने बधावो देवण माथे जोर दीनो। श्री बागड़े रासायनिक खाद री ठौड़ प्राकृतिक खेती काम लेवण अर ई रा बारा मांय जाग जगावण सारु ई कह्यो। राज्यपाल पाणी बचावण री अरज ई कीनी। वे जोधपुर कृषि विश्वविद्यालय ने भारतीय कृषि अनुसंधान परिषद कानी ऊँ 'ए' ग्रेड दी जावण अर साखां री वैज्ञानिकां कानी ऊँ विकसित करी ज्यी नुवी किस्मां री सराहवणा कीनी। श्री बागड़े खेती-बाड़ी रा हलका मांय नुवी चुनौतियां रो सामो करण सारु आर्टिफिशियल इंटेलिजेंस, ड्रोन अर रोबोटिक्स काम लेवण माथे जोर दीनो। राज्यपाल जय जवान, जय किसान, जय विज्ञान अर जय अनुसंधान' रो मंत्र अपनावण बाबत कह्यो। ई मौके राज्यपाल डेयरी अर खाद प्रौद्योगिकी महाविद्यालय अर छात्रावासां ने ई जनता ने सूप्या। जळसा मांय 403 विद्यार्थियां ने उपाधियां अर 15 विद्यार्थियां ने सोना रा तमगा दे र नवाजी

ज्या। जळसा मांय केंद्रीय संस्कृति अर पर्यटन मंत्री गजेंद्र सिंह शेखावत ई विद्यार्थियां ने सम्बोधित कीना।

000

प्रदेश मांय आज चेटीचंड हरख-उमाव सागे मणायी ज्यी। भगवान झूलेलाल री जयंती रे मौके राजधानी जयपुर मांय निकाळी ज्यी शोभायात्रा मांय मुख्यमंत्री भजनलाल शर्मा ई शामिल व्ह्या। ई मौके मुख्यमंत्री कह्यो के चेटीचंड सामाजिक एकता अर म्हाणी सांस्कृतिक विरासत री जीती-जागती मिसाल है। वे भगवान झूलेलाल रा अवतरण दिवस अर चैती नौरता री शुभकामनावां देता थकां कह्यो के सिंधी समाज हमेशा देश री बरकत सारू समर्पित रह्यो है।

शोभायात्रा मांय राधा-कृष्ण रासलीला अर नरसिंह अवतार समेत 50 ऊँ बत्ती सोहवणी झांकियां शामिल रही। सवाईमाधोपुर जिला मांय ई भांत-भांत रा धार्मिक अर सांस्कृतिक कार्यक्रम राख्यी ज्या। वठे निकाळी ज्यी शोभायात्रा माथे फूलां री बरसात करी ज्यी। गंगापुरसिटी मांय गौ-सेवा अर साफ-सफाई रा कार्यक्रम राख्यी ज्या। पाली मांय झूलेलाल मिंदर मांय खास सजावट करी ज्यी अर गाजा-बाजा सागे शोभायात्रा निकाळी ज्यी। वठे भजन संध्या अर महाआरती रा खास कार्यक्रम ई राख्या जा रह्या है।

000

काल ईद-उल-फितर रो त्यौहार मनायो जावेला। ई मौके न्यारी-न्यारी ठौड़ां ईदगाहां अर मस्जिदां मांय सामूहिक नमाज अदा करी जावेला। राजधानी जयपुर समेत अजमेर अर पाली समेत न्यारी-न्यारी ठौड़ां ईद री तैयारियां पूरी कर लीरीजी है। ईद रे मौके अजमेर मांय ख्वाजा गरीब नवाज री दरगाह रो जन्मती दरवाजो खोल्यो जावेला। पाली मांय खास नमाज रे दौरान व्यवस्था बणायी राखण सारू आवण-जावण रा गेला मांय बदलाव करी ज्यो है। ईद रा तुंवार रे मौके बाजारां मांय खूब चहल-पहल निजर आ रही है अर लोग कपड़ा अर दूजी सामग्री री खरीदी कर रह्या है।

000

प्रदेश मांय काल गणगौर मणायी जावेला। ई मौके आज सिजारो मणायी ज्यो। सिजारा रे मौके परण्योड़ी महिलावां अर बेटियां ने वां रा ससुराल अर पीहर पक्ष री ओर ऊँ कपड़ा, मिठाई अर उपहार भेज्या जावे है। राजधानी जयपुर मांय काल गणगौर री पारंपरिक सवारी सिटी पैलेस रा त्रिपोलिया गेट ऊँ निकाळी जावेला। सवाईमाधोपुर रा जूना शहर मांय ई शाही लवाजमा सागे गणगौर री सवारी निकाळी जावेला। पाली जिला रा बाली मांय नगरपालिका री ओर ऊँ गणगौर मेळो भरेला। मेळा मांय घुड़दौड़, साइकिल रेस अर लोक नाच सरीखी होड़ां ई राख्यी जावेला। उदयपुर, जोधपुर अर बीकानेर समेत केई जिलां मांय गणगौर री सवारी निकाळी जावेला।